



Inspekcije bile na terenu, čekaju se mjere

# Inspektorima u Petrovcu se ne žuri

Najava odlaska privrednika Jusufa Arifagića iz Bosanskog Petrovca nije potaknula nadležne na rješavanje problema

Federalni ministar poljoprivrede, vodoprivrede i šumarstva Šemsudin Dedić još nije pronašao rješenje za zemljište u općini Bosanski Petrovac, čemu su se investitor Jusuf Arifagić i načelnik Petrovca Zlatko Hujčić ponadali nakon što ih je Dedić podsjetio na terenu prošlog mjeseca.

## Razmatranje

Arifagić i Hujčić za Oslobođenje su već ranije govorili da čekaju na odgovor, dok nam je jučer ministar Dedić kazao da se radi na tome.

- Greške su napravili svi, i na općinskom i na kantonalnom nivou. Nerealno je sad očekivati od mene da ja to preko noći riješim, a i mi čekamo povratne informacije od inspekcijских službi, kazao nam je Šemsudin Dedić, upućujući nas na svoje saradnike u Ministarstvu za detaljne informacije šta se sve poduzima.

U Ministarstvu su nam kazali da se razmatra Arifagićev ugovor, te da su dali nalog inspekcijama da ispituju da li je ugovor u skladu sa Zakonom. Ako jeste, Ministarstvo će poduzeti sve radnje i mjere da osigura primjenu Zakona o poljoprivrednom zemljištu u njegovom slučaju i tu neće biti problema.

Ukoliko inspekcija utvrdi da taj ugovor, koji su zaključili načelnik Bosanskog Petrovca i privrednik iz Kozarca, sadrži neke nepravilnosti, onda Federalna uprava za inspekcijske poslove i poljoprivredni inspektor treba da kažu u kojem dijelu su one uočene te na osnovu činjeničnog stanja predlože mjere.

- Mi to još ne znamo, jer postupak nije okončan. Zahtijevali smo izvještaj i još čekamo odgovor inspekcija koje imaju nezavisan rad, kazao nam je savjetnik Ervin Bibanović, uputivši nas da pošaljemo pisani zahtjev za informaciju, što smo i učinili te čekamo na odgovor.

Međutim, Jusuf Arifagić je prošlog mjeseca doživio prozivke na sjednici Općinskog vijeća Bosanski Petrovac. Većina u Vijeću predvođena SDA i SNSD-om uskratila je podršku načelniku Hujčiću, te zatražila preispitivanje ugovora sa Arifagićem, koji ih je preduhitrio jednostranom odlukom o



Šemsudin Dedić: Svi su napravili grešku

prekidu ugovora, najavivši da napušta Bosanski Petrovac.

Saznajemo da u federalnom Ministarstvu za poljoprivredu, vodoprivredu i šumarstvo u spisu ovog predmeta posjeduju originalni ugovor koji je, po njima, još važeći. Arifagić, iako je zaprijetio odlaskom, ipak je ostao gdje jeste, vjerovatno čekajući da se nesporazum riješi i da mu se otvore mogućnosti da nastavi preseljavanje stočnog kontingenta iz Kozarca. Taj proces za sada jeste obustavljen.

- Šta drugo da činim kada sam platio zakup zemlje, a ne mogu ući u posjed. Evo, već drugu godinu je kasno da se sije stočna hrana, kazao nam je Arifagić, kojem i ova godina investiranja u USK propada zbog čekanja da se problem riješi.

Podsjećamo, problem je nastao kada se ispostavilo da je okupirano isto zemljište koje je Arifagić zakupio u Općini Bosanski Petrovac. Ono se koristi na osnovu zahtjeva

za dodjelu koncesije koji je uložio Haris Mešanović u ime zadruge koju predstavlja.

## Novi zakon

U federalnom Ministarstvu su nam kazali da znaju za to, da zapravo traje od 2005. godine te da kantonalna komisija za koncesije još nije završila taj postupak odlučivanja o zahtjevu za dodjelu koncesije.

Zbog istih činjenica služba općinskog pravobranilaštva je sugerirala načelniku Zlatku Hujčiću da bi ugovor mogao biti nezakonit, što su u OV-u rado dočekali, koristeći situaciju za obračun sa Hujčićem, koji je na izborima bio nezavisni kandidat.

Vrijeme za Arifagića brzo prolazi i svakim danom ima sve veću štetu. U početku su ga općinske i kantonalne vlasti u USK-u dočekale raširenih ruku, da bi ga promjenom političkog kursa počele osporavati.

Možda se opet promijenil mišljenje već naredne godine pred izbore, ali za Jusufa Arifagića sve je to noćna mora koja će svakog investitora brzo otjerati iz FBiH.

Istovremeno, u Ministarstvu ističu da planiraju izradu novog zakona o poljoprivrednom zemljištu, jer su evidentne poteškoće u primjeni onog aktuelnog. Iako je ovaj slučaj sigurno potaknuo te procese, za Arifagićevu farmu, koja se drugu godinu opstruira, moglo bi biti prekasno.

Može li Općina izdati zemlju investitoru ako u kantonalnoj komisiji za koncesije 10 godina odlučuju o zahtjevu za korištenje?